

本朝分省人物考

人物考卷之八目錄

北直隸順德府

楊述

高從吉

張瑛

韓翼

許能

崔恭

安珮

孫瑜

馬銓

毛玘

李厚

韓燾

馬騏

王震

吳相

王本固

趙孔昭

達其道

楊鈐

王可信

王寅

王鼎

張學禮

朱裳

張贄

撤大經

張仁覆

呂應律

李尚賓

陳登雲

高瓚

本朝京省人物考卷之八

北直隸順德府

楊述

楊述邢臺人洪武間任歸安知縣陞兵馬指揮使事
父母至孝敬飲食必親供每進酒壽親必僕僕跪勸
屢再不違顏色愉愉至今貳百餘年其族人長老猶
有談其孝者

高從吉

高從吉邢臺人永樂初任南京山西道御史巡按湖
廣浙江陝西四川四省以風力稱永樂十三年交趾

叛命英國公張輔征之以從吉爲監軍獻績有男女
田地衣服誥命之賜陞都憲總督交趾軍務尋卒于
王事

張瑛

張瑛字子玉世居順德之邢臺自幼及長豐偉凝峻
初補弟子員勤於問學同輩咸推讓之甫弱冠卽以
明經領永樂丙子鄉薦授陝西寧州學訓導調武德
衛學所至嚴教條責實效生徒多成材者秩滿擢吏
科給事中稽考銓選封駁章奏克舉其職 宣宗爲
皇太孫時 太宗選文儒侍從講學瑛實與焉 宣

宗正位東官陞左春坊左中允改洗馬 宣宗卽位
首錄舊勞陞行在禮部右侍郎宣德改元二月陞本
部左侍郎兼華蓋殿大學士入內閣典制誥明年陞
尚書兼職如故修 太宗 仁宗兩朝實錄爲總裁
官旣而命蒞南京禮部蓋以根本之地非重臣不可
也凡再奏績當赴京 上皆賜璽書以止其行其見
委任若此後以父喪歸於家 宣宗旣遣官治葬祭
詔瑛復職視事而竟不起矣瑛於經史善講解其侍
宣宗每與言帝王傳授心法與夫修齊治平切要
之言漢唐以下人君行事可爲勸懲者必反覆敷陳

之日見親厚先後賜賚甚多當起復入見時 宣宗
特出御製詩詞并緡錢二千錠賜之瑛退而語人曰
古人云稽古之力予亦云然瑛性寬厚喜愠不見待
人接物一以真率爲本推讓賢能僚案協和平居嬉
嬉然若無所介意臨事施設毅然不可奪人以此稱
之而亦嘉其遭際之盛云

韓翼

韓翼順德府人舉鄉貢進士永樂間任主事時河決
爲患漕運艱苦翼奉命治水有功陞大理寺少卿當
時有平獄緩刑民無寃之頌歷朝四十年憂國愛民

始終一節卒于官欽賜葬祭

許能

許能字任之沙河人永樂間以貢入太學一日成
祖夜夢緋衣人升殿翌日能早朝上異之遂欽
授兵科右給事中歷都給事居諫垣七年忠諫頗多
陞浙江叅議時錢塘江水爲患能塞治有功民建祠
祀之官終山西布政使

崔恭

崔恭字克讓廣宗縣人正統丙辰進士除戶部主事
提督延綏軍儲有能譽陞郎中乙丑考最知萊州府

事恭至巡行屬邑撫良善去貪暴尤加意學校增修
文廟齋舍生徒德之丁卯登萊旱蝗遣使遍捕且焚
且瘞蝗不爲害明年復旱乃發郡縣倉穀勸富民出
粟賑之奏免膠州卽墨諸逃戶芻糧民賴全活已已
北虜入寇逼京師恭括所屬機兵雜民壯爲什伍入
援京師是歲建議城臨清檄發郡夫恭以方春民務
耕作及秋始以郡民赴役適中其會人服其識治萊
六載威惠大行後數年山東大饑萊父老相與言曰
使崔公在我輩何至此極乎具詳美政立去思碑於
楊震祠中以震嘗刺是郡也景泰壬申陞湖廣右布

政使諸凡取辦於民間者諭寮屬革去之苗蠻侵武
岡巡撫三司議進兵督餉練兵助之苗卒效順岳州
謀報公安監利流民擅相殺害恭令下曰願附籍者
收之不願者俟下秋遣歸事不迫而民稱便未幾遷
江西左布政使將行一無所取篋中惟大明律書數
冊衣數襲而已比至江西闢理獄囚無病死釋放陷
盜良民活者甚衆寧王與弋陽王交怨恭陳天倫同
氣之義二府始平又作均徭法至今行之天順戊寅
改左副都御史巡撫南畿所至郡縣進諭耆老令人
得盡言於以周知利病崑山民王凱素無賴利別籍

所遺田產自冒爲軍御史連坐隱蔽者二十四人悉
配戍衆訴於恭恭下有司集里老覆其實事遂白乃
坐凱罪時米價踴貴出倉米給民而取其值以充義
役費米價遂平松江舊役澇清夫天旱則開門隨潮
引清水灌田水大則泄之以防滄沒後漸廢弛沿江
之民歲被淫潦卽親詣其地督工挑浚分江爲三段
崑山縣自夏界口至白鶴江上海縣自白鶴江至泖
家渡嘉定縣自泖家渡至莊家涇皆以次受役至今
利之又浚曹家港蒲滙塘新涇大營浦諸水民因目
曹家港爲都臺浦以識不忘四年冬 英宗諭大學

士李賢以吏部右侍郎不可久缺命與翱訪其人明
日於文華殿以恭奏 上喜得人至則佐翱用人無
所偏黨商確政理翱亦倚信不疑五年轉左一日
上謂李賢若吏侍姚夔崔恭亦佳賢曰二人才器異
日皆尚書之選 上將嚮用不果成化三年翱卒於
位遂補恭吏部尚書未幾丁母憂七年起南吏部南
京屬官中恃才放恣交通賄賂者多乃黜郎中方嵩
門相等十數人士風爲之一新南雍監生歷事滿必
抵北紀選而還卒業其中貧乏者病於往復率多淹
滯疏令南士得紀選於南部定爲令甲午勅叅贊守

備機務與成國公開心布誠協力政令軍民皆翕然
畏服留都恃以爲安丙申兩抗章乞休致不允明年
夏以不視事者三月復乞歸田 上特賜書以
其歸文武士餞於國門外者千人道傍觀者十里不
絕嘖嘖共言其賢歸二年足跡不入城府靜坐一菴
教子孫讀書而已疾急謂諸子曰吾平生無益於國
勿乞恩煩瀆竟不及家事卒年七十有一子二珂璿
珂本從子璿生之明年以珂廕國子生恭爲人寬平
坦易中無芥蒂好善惡惡出於天性臨事剛而能斷
而仁愛之意藹然獎掖後進惟恐不及初廣宗地僻

士不見全書出貲鏤刻五經四書布之通邑後廢宗
之士科不乏人卒贈太子少保謚莊敏

安 翊

安翊字伯玉邢臺人由舉人天順間爲福建道御史
奏劾曹欽逆叛正直謇諤中外憚之以極諫土木貶
刺朔州尋調乾州治有善狀入覲賜宴于禮部有才
行超卓政績顯著之褒三載當遷百姓詰 闕保留
竟卒於官

孫 瑜

孫瑜字孟秀邢臺人登進士授刑部主事歷員外郎

中陞開封府知府開封府素號繁劇處之有法不以爲勞持已有冰蘖聲及卒至無以爲殮巡撫檄所司辦提學陳選雅知瑜廉檄諸學賻祭皆近代仕宦所無

馬銓

馬銓字秉衡南和人登進士授戶科給事中多所建白陞湖廣叅議襄人有訐奏親藩者撫按委勘之銓但治撥置者罪事上竟得俞旨改督武當山有金殿香錢素無紀籍守者得肆侵漁銓置籍嚴出入歲得銀三千餘兩陞叅政歷官左布政累著茂績年七十

卒

毛玘

毛玘字國珍任縣人爲府庠生後應貢兩讓次者卒
舉鄉薦登進士授蒙陰知縣先是母久失明祈於天
母目復明人以爲孝感有逋稅不完召逋者理論之
不數月報完民有犯逆者密以金祈脫玘竟正其罪
某叅政以均徭役至意有所需曰殘下媚上吾不爲
也郡守有子喪他邑祭賻甚厚玘獨不致守啣之卒
以是嫉遂歸

李厚

李厚字洪載順德府人以進士爲偃師令剛明果斷
吏畏民懷時值旱荒勸富賑貧民用安妥以政最擢
監察御史直聲凜然與同列早朝時議雲南賞軍同
列憚遠厚奮然曰爲臣子豈可避難明日命下遣行
厚至雲南處置有方甚得夷心後丁憂家居守令欲
修宅舍輒辭不從鄉邦重之

韓 燾

韓燾字宗仁平鄉人母夢鳳鳴而生人曰此兒他日
當瑞世稍長知學同庠毛玘齒先學優卽師事之發
解丁酉與玘同登進士授刑部主事鞫獄明刑一循

公道司寇彭公最號嚴明不輕許可惟燾所白無不
當意一時同曹傾讓諸司有事恒咨決焉陞員外郎
中悉留本部弘治甲寅河南藩府與巡撫交相論奏
上命法司選能者往按衆皆難之燾獨毅然至則
裁決允當兩皆稱服 上嘉其能陞金華知府訪民
瘼剔奸蠹凡所興革皆以愛民爲心修理學校規制
宏敞民無勞費與諸生講明經學折衷義理專意恤
民預修荒政兩浙大饑朝廷遣大臣賑貸獨金華民
粒食無恙迎養二親于官出理政事必入告曰思貽
父母令名不敢爲親辱在郡八年聲名籍甚以疾卒

士夫惜之

馬 騏

馬騏字文祥鉅鹿人曾祖諱子玉洪武初大祀奉使有德於華陰立祠祀之騏少俊偉補邑弟子員有奇節縣博卒于官忽失所有百金妻子殆無以歸騏曰家之藏誰知之此必僮僕潛移他所拵爲已有耳約儕輩往尋弗得數日復獨往見垣磚參差起之金見乃告其妻子取之騏後領鄉薦家居值大水平地丈餘溺死無算其父村居厄於水不知所在騏沿水號泣忽一小舟至遽登往親識勸少需騏曰爲親死復

何憾中流幾覆少頃得抵大樹下因憑藉以免獲見其父立樹上絕食已三日後父患秘結醫不能奏功騏祝於神而導之便下咽之疾尋愈弘治辛亥授封丘令邑多逋賦爲豪猾局騙騏曰賦之貧民官吏擾之也於是禁制約束之租賦之期爭先輸納巡守至有索分例者騏曰民不堪命尚可科取乎哉吾官可去民未可擾也巡守不可奪後有至者不復言分例矣然上司滋不悅遂引疾乞休民皆憤惋泣下相率齋白金幣馬以餽皆郤之家居布衣蔬食恬如也年七十終

王震

王震字威遠邢臺人弘治癸丑進士歷戶部主事員外郎中出納錢穀稱職陞郎陽知府當道累薦卓異陞河南叅政有安儲王平郡盜功尋布政陞應天府尹致政歸歷任所得書籍千餘卷送府庠資士子誦讀孝思至老不衰建永感堂以志不忘焉

吳相

吳相字汝立內丘人戊戌進士初授建昌府推官丁嫡母憂哀毀骨立廬于墓三年復除東昌府讞獄明允後選浙江道御史彈劾不避權貴人咸以名御史

稱之陞河南府知府時伊藩暴虐不法相善爲駕馭
故終任不逢其怒華州諭德某憑分宜寵過郡作色
矜傲相戒驛傳勿給某爲媿謝之至於廉介子惠周
恤民隱百姓皆曰無如我吳公也後陞山東按察司
副使卒至今鄉評稱耿介者必曰吳御史云

王本固

王本固字子民邢臺人老成持重不輕言笑嘉靖甲
辰進士任樂安令縣濱海風號難治本固惟以清淨
理之事農桑重學校罷諸不急務良吏之稱遍於遠
邇徵拜監察御史初使秦以覈兵行繼使蜀以巡察

行先後奉公守法官屬肅憚如一未幾丁內艱服闋
按浙值倭寇猖獗時有海寇王直者逃罪居倭數爲
浙患督府以計誘歸欲釋罪官之本固不可竟阻其
議置大辟罪朝論避之督府又以寇平欲置酒高會
號太平宴本固以用兵之後不宜冗費乃罷後督府
又以糜兵餉事爲言者糾冀其勘報掩之竟以實聞
由是督府愈結分宜每求所以中傷之會遼左饑奏
命賑給米六萬石以騾車運意爲緩不及事假此禍
之耳奏改一半折銀濟遼陽遠地一半本色濟廣寧
近地凡再閱月而完遼左安焉故事御史八年序宜

留內竟以分宜憾出陝西西寧副使寧有指揮星鑑者罪當削職潛入邢臺以千金行賄本固覺竟坐以法又有莊浪糧官捐勒軍餉以致魯府家丁倡亂委曲諭以情法亂者僉服後分宜敗以叅政尋陞大理寺少卿晉南京右僉都御史奉勅提督江防晏然無警尋移北晉左副都御史歷刑兵左侍郎協理營務隆慶初改吏部會新鄭以政府攝銓衡任意予奪公卿纍息下之屢以不合故竟遷南京吏部尚書時當大察京官有爲江陵忌者一給事中一御史遺書欲俱罷其官竟不允始末歷二柄臣毫不少挫持正不

阿蓋如此萬曆元年以二品考績還移疏乞休准調
理疾愈以江陵憾故家居不起謝人事閱醫藥周貧
恤族外無他羨焉迨江陵歿屢被薦舉起用漠如也
年七十卒歷事三朝偉節豐功昭人耳目欽賜祭葬
如例

趙孔昭

趙孔昭字子潛邢臺人少有奇質言動不凡年十八
舉於鄉甲辰成進士任鄆陵知縣清慎明敏尤長聽
斷百姓尸祝之後詔爲監察御史出按遼東時遼將
李錡不法咸寧侯仇鸞恣橫言官側目難於先發昭

首劾之繼按福建風紀凜凜權豪斂手再按兩浙會
倭寇猖獗大肆殺掠歷世廟宵旰有詔切責撫臣勦
之昭以巡按御史紀功罪一不當卽寘重典當事者
難之時督撫某結歡權相氣燄薰熾異已者傾擠立
至時應天府臺曹橫被陵轢且欲誣以重罪孔昭對
衆抗辨略不少遜事竟寢會監乙卯秋試前督撫陰
置所私欲其子中式微以意示之卽出示令勿唱名
其計遂沮及試錄成某序多溢美盡削之簾內外諸
執事相視有變色吐舌者次年平倭績 上錄其功
陞俸一級有白金文綺之賜尋陞南京大理寺右寺

丞一時疑獄多所平反戊午陞南京都察院右僉都御史提督操江兼管巡江 命甫下丁外艱歸服闋起都察院右僉都御史巡撫宣府贊理軍務時黠虜人寇京師震動同總督江公統兵星馳直走岔道虜乃遁去初宣大巡按董公欲以功狀上且云當得陞廕力辭之會科臣媒孽論劾不俟終日以行時庫有羨金數萬守者以請竟不取癸亥丁母憂服闋會穆廟卽位復以右僉都御史起用巡撫浙江舊宮闈服御倚辦東南中官織造歲不停遣尅減騷擾民不勝苦抗疏罷之又條陳時政十事 上嘉納焉戊辰

陞戶部右侍郎尋陞左侍郎兼右僉都御史總督漕
運兼提督軍務巡撫鳳陽時徐淮大水民甚苦之夙
夜修荒政題請蠲賑外仍發官藏數萬金招商易菽
粟哺之全活不可勝計淮人至今誦德云科臣有息
其名望者承人風旨乃以蜚語誣奏回籍 世廟初
復起兵部左侍郎兼右僉都御史提督鴈門等關兼
巡撫山西時順義雖稱款塞事實叵測昭徧歷險隘
指畫方略每秋防未嘗解嚴歲報欽賞及遣大臣閱
視疏功最又蒙欽賞尋詔以右司馬原官協理京營
戎政比回部管事痰火劇發遂請致仕爲人剛方廉

介言動真率不設城府無世俗依阿澗忍態故宦轍
所至每有虜功偉績雖間值沮抑殊不爲意也歸家
十年春秋墓祭外靜坐觀書蔬食布衣宴如也嘗題
趙清獻琴鶴圖云德馨何用更焚香琴鶴隨時亦覺
忙但得洗心無一事只將義命作行藏又題楊伯起
却金圖云清夜孤燈獨坐時關西心事總天知卻金
自是平常事太史標題似好奇年六十五而卒訃聞
欽賜祭葬如制外遺疏稿并詩文若干卷載藏不述

達其道

達其道字行甫淵之兄任縣人生而穎異絕人初名

王寅字時正平鄉人舉人知鎮遠縣適大稔後民生彫瘵寅勸農興學請託不行三年以治稱當道累薦其賢鄰邑李端爲盜所誣上司委寅按之卒爲辯理端持金謝不受曰明爾之寃吾事也何謝爲邑人愛之如親去任立碑誌之

王鼎

王鼎字重器鉅鹿人幼穎慧甫弱冠習禮容先達器之旣成立好學能文時譽浸起舉進士官大理評事家貧所得俸給僅可糊口布袍之餘日側錦繡之間怡如也嘗謂人曰慎勿妄語此口一妄彼雖不言而

腹已誹矣人攻其過宜直受而改之澧陽周偉稱其學問純正人品剛方云

張學禮

張學禮字以立平鄉人登辛未進士授行人遷司副奉使冊封山東親藩餽一無所受擢南京監察御史彈劾不避權要未幾卒于官所遺者圖書數卷而已察宋重其清白共白于都臺贈白金二百兩檄本邑辦致祭田

朱裳

朱裳字公垂順德府沙河縣人父鳳嘗教之曰汝裳

勵操行無以家爲慮予一盂飯一裘葛之外於我何
有裳刻志自砥爲諸生衣食不續裕如也正德甲戌
登進士擢監察御史巡山西鹽法錢寧差官市鹽拒
不與有倖人奏討鹽引司空石公曰爾徒往無益朱
御史定不允也時御史王相被閹鑑構下獄裳抗疏
曰朝廷設御史如齊民蓄猫捕鼠猫鼠相持主人其
可助鼠耶疏鑑八罪王得從輕刑又勸上戒佚樂
近儒臣武皇巡幸諸司請大治備以候裳不許後
果有以重斂獲譴者人曰如朱公在免此矣還朝又
諫止南巡數嬖人熒惑之禍十五年庚辰出知鞏昌

民儉而富俗不務學裳與文振教郡以大治嘉靖初
詔舉先朝故典選天下方面知府治行高者賜燕勞
得八人鞏昌守以清苦與列後給事中劉世揚等舉
內外清正臣大學士石瑄而下八人裳居次嘉靖四
年陞浙江副使冬夏惟紗絹袍各一襲無可更者夫
人荆釵布裙菜羹糲飯親操炊汲迎父就養同列共
製一衣爲壽父力却之其家教嚴正如此會御史王
璜按浙不畏權勢浙有重人銜之璜竟罷官裳以副
使齋賀表至京重人問璜何如人曰真御史也重人
慚沮七年陞福建按察使十年陞浙江布政使十二

年陞都察院右副都御史總督河道建牙於濟十三
年丁父憂勅賜葬祭自都御史守制還寒約如素士
居無賓堂土壁席門自奉止茹蔬菜十八年再起原
官仍前任本年夏卒於官謚端簡性淳篤朴直目所
見必行言雖久可復凡在官鑰戶遠嫌堂室如寺妻
子甘菲惡益窮經探賸以聖賢自飭謂尊德性道問
學其的旨也衍而成論士頌其廉知友服其不市名
民惠其不取享年五十有八而卒

張贊

張贊字行道郡臺人舉人性孝慈豈弟以親老授益

都令初與秋試取四人俱第人服其甄鑑善政爲民
戴誦衆方倚賴尋丁母憂歸服闋補保安縣卽乞休
是年四十八親友勸之仕曰吾仕爲親親已終矣復
仕何爲蕭然林下二十載動無踰閑人雅重之

檄大經

檄大經字守道廣宗人正德丁卯鄉試第七人少聰
慧日記數千言篤志於學以聖賢自期家貧無書走
借於廣宗崔尚寶家未幾還之曰吾已得其槩矣以
病尋醫京師上書少師西涯稱其才曰海內人豪也
甚禮重之讀書郡東官舍郡守高其人往見之值母

忌不出接守怒揚言欲以官舍與人大經卽移歸守遣人謝之不去又召其弟兄再三謝終不去其介類如此平生著述甚多皆未脫藁與士夫書惟勸以聖賢爲準年三十二而卒士大夫甚悼惜之

張仁覆

張仁覆字子旻邢臺人丰姿俊偉制行端嚴以嘉靖壬子鄉薦仕米脂令政治爲諸邑最互市四次虜僉諾服欽賜表裏銀四十兩獎云加意疇邊矢心報國總理貨物之出入而稽察嚴明主司宴賞之等威而處分詳允且臨場而多方駕馭適隨機應變之宜監

市而逐處分解得因事翕張之體宜當厚賚以勵臣
工以縣令而被寵褒前此所未有也時期大用倏卒
家世清素如故

呂應律

呂應律字贊元南和人性孝友朴直少年人卽服其
行領隆慶癸酉鄉薦寒素自甘無一事干囑公家郡
守嵩縣王公嘉其節造第給粟周之後授尹昌邑三
載一塵不染忽以疾卒官裝笥索然喪具且無以辦
旋入名宦士民至今祠祀之

李尚賓

李尚賓字允興廣宗人性謹朴登隆慶戊辰進士居鄉如寒素初令高密密最疲邑賓留心撫字民甚愛戴爲立祠祀之陞戶部主事愈廉謹管祿米倉一切常例盡革之比丁父憂俸金僅餘八兩居喪哀毀過禮服闋監兌小灘盡剗宿弊尋陞本部員外郎嘗自言曰予不苟取一文以玷官箴會有足病適內艱訃至遂感傷而卒壽不滿德官不償才人共惜之

陳登雲

陳登雲字從龍別號南濱唐山縣人萬曆丙子舉於鄉明年丁丑成進士論議慷慨有烈丈夫風印以古

今善敗犁然洞晰下筆滾滾數千言可立就雲少病
痞百療罔效竊自念痞者否也可以通否惟窮埋乎
因下帷日發諸載藉讀之更無他念蓋二載而病如
失所請益以深一出 魁鄉會成寅除鄆陵令
至鄆見細民苦於豪強文法舞於奸吏冗費無節賦
役不均田野荒蕪學校頽廢河水爲患流亡載塗嘆
曰此邑之所以病也首黜積役數十人捕所謂五虎
者置之法躬履畝度境內因爲三等賦役以是爲
差令訟者得以墾田贖罪所墾歲百餘頃爲建屋宇
置器具牛種以招復業來者旣衆復教之以種植桑

榆益其生業洪溝青泥諸河爲扶溝所壅歲溢爲災
力爭於部使者令隣封毋得壅激而河患頓息斥俸
餘捐贖鍰新學官給學田興除之外一意以教化爲
務癸未拜監察御史初按遼左次按晉後按中州按
遼悉心稽覈條上安攘十事而其所特疏者在議賞
功之異大略言首功之賞給發不時貧軍不能枵腹
以待不得不鬻之富人富人挾其貲以冒功累級多
貴至叅遊者此其人力不能禦敵智不能謀虜而冒
濫名器混淆體統役占軍士糜費俸給邊鎮之蠹無
大於此在晉在中州值歲大饑晉人猶以木皮草根

雜土爲食中州則父食子夫食妻以人爲市以雁糞
爲糧矣皇皇然爲請蠲請賑請弛山澤之禁請借留
都之儲 上發帑金數十萬以至官闈察案咸捐俸
佐之登雲亦自清贖金得三千有奇爲郡邑糴本而
民始獲甦凡政先其大者如此若夫約已率屬激濁
揚清則丰裁卓然嘗有餘勇先後侍經筵監會試主
計吏筦京畿霜肅風行有觸必言有言必盡多人所
不敢言者信陽王太史見其祈天永命疏歎爲隆萬
以來奏章第一忌者爭欲甘心焉賴 主上明聖竟
無微譴幾滿九載推少京兆廷尉丞俱不報因以假

請歸而疾復作，雖抱疾猶喜肅客。每語及時事，意有所不可，輒不勝憤。至強起坐榻上，語刺刺不能休。以是病轉增久之，遂卒。年五十有八耳。有志未就，鬱鬱以死。人咸惜之。

高 瓚

高瓚字大用，邢臺人。幼貧，好讀書。嘗走借友人書抄誦之，以歲貢授樂陵訓導。聚諸生講解經史，贄金盡。卻茹淡，攻苦尋陞。大同諭乞休家居，日以教誨著述爲事。雖老不倦也。臨終書對一聯云：到得七十四歲，歸還故鄉都是八字五行。造定機軸，庶幾乎謂樂天。

ノ事クハノ物オ
者ノ

知命者歟

三二

張天叙

正朝分
意之

人物考卷之九目錄

北直隸廣平府

賈銓

楊璵

郭恕

張鏞

郭珮

張斌

馬顯

徐敬

李果

劉誠

鄭賢

鄭銘

王濬

郭忠

賀思聰

連盛

董威

馬子聰

蔣勛

孫修

胡瓚

王育英

申綸

薛謙

杜璋

朱雱

趙雋

張潤身

連鑛

李仁

王允武

張棐

石永

賈待問

王世揚

姚三讓

本朝京省人物考卷之九

北直隸廣平府

賈銓

賈銓字秉鈞先世山西之太谷人後徙居廣平銓純謹敦厚寡言笑博通經史永樂甲申進士擢刑科給事中尋掌科事彈劾無所徇當道憚之出爲雲南大理府知府至任革去一切宿弊以興民利而水蘖之操豈弟之政聞於上下會征麓川興兵數年大理當其要衝百需出焉銓區畫盡善事無不集民無或憂時靖遠伯王驥總督軍務每見之輒爲加禮退而歎

羨不已陞雲南布政司右叅政仍掌府事既而陞左叅政管司事尋陞左布政使久歷雲南稔知俗尚凡所施設不拂人情民夷晏然天順四年入覲賜燕陞都察院左副都御史巡撫山東未幾兼撫河南往來二省便宜行事爲政務實而耻浮名或面稱其美卽推而不受喻之曰此某同僚之所主而某受委任者之所行也故人莫究所自成化二年勅取回京理都察院事繼掌院章所存所發一循故額人不忍欺三年六月疾竟不起 朝廷遣官葬祭謚曰恭靖

楊璵

楊輿清河人家素貧積學力行倜儻有大志人多奇之中永樂戊子科鄉試任直隸廬州府通判剛方正直難干以私明法勅罰而仁愛之意常存廬之士農咸欣戴焉政聞遷戶部主事厥職益懋仕至郎中兩膺封錫以疾終

郭恕

郭恕字安仁世居雞澤弱冠領永樂十二年鄉薦初授思南府推官再歷湖州府明恕兩盡多所平反所
在以明允稱及擢御史屢有建白英廟賜錦衣一襲以旌其直後轉官山西叅議先守雲中後奉勅

守鴈門積糧撫士要害重地卒賴無虞恕遊宦年久多不挈家先在思南止帶一僕又以不檢遣迴獨一身遠寄萬里之外而未嘗少動其心歸老林下儉素如寒士大叅葉盛稱其行純而政善宦久而節堅人以爲實錄云

張鏞

張鏞肥鄉人少業儒有文譽中永樂十八年鄉試初授近官 朝廷見而器獎之時風憲員缺遂授監察御史風紀凜然出爲平涼知府下車訪利病得失鋤強暴綏善良一郡咸畏威感德時虜賊入寇鏞畫策

攘却之民爲立平虜碑以紀其功三載奏績入見
上素聞其清苦以鹽運乃積貨之司非廉介者不能
釐其弊也遂拜鑛山東都轉運鹽運使剔宿蠹饒國
計雅能稱上意焉

郭 璠

郭璠威縣人永樂庚子舉人任戶部主事籌量國計
出納維允陞刑部郎中門無私謁理冤獄繫囚多
所裨益子銓登成化己丑進士任戶科給事中屬志
忠慎馳名諫垣卒於官人皆惜之當時稱爲三清先
生今已入祠

張斌

張斌永年人正統己未進士任戶部主事忤權奄王振謫戍遼東後朝議以浙江鹽法夙弊積多惟斌可以釐正復舉以前職往清理之斌持法剛正不通賄賂復爲權倖所忌有平日邀利於其間者不遂所欲斌時有微疾遂內外通謀駕言中風以艾炙之復加以毒被害時悼惜之

馬顯

馬顯廣平人登正統壬戌進士授戶科給事中己巳之變顯扈駕北征幾沒於陣景泰初進都給事中

適權奸用事顯指陳得失多所裨益尋中忌者出爲
河東都轉鹽運使鹽法流通國計用裕天順戊寅擢
四川左布政使時蠻寇猖獗境內繹騷顯贊畫戎務
調度軍餉蜀人賴以帖然旬宣之政不可悉數秩滿
陞巡撫都御史奏復留三年成化庚寅擢南京兵部
右侍郎值歲大侵奉 詔巡視鳳陽等郡省民瘼撫
窮獨擊奸慝民賴安堵轉左侍郎未幾丁內艱服除
乞致仕 詔許之退休林下十五載卒享年八十有
五計聞遣官諭祭顯居家孝友忠厚稱重鄉邦出處
大致真不愧於古人矣

徐敬

徐敬永年人少警敏有遠志與同郡郭謙共硯席時妖人唐賽兒以左道惑衆敬偕謙執之於官事 聞召見授謙以永年諭奇敬青年偉貌遣入太學肄業正統間選授戶部主事景泰初督儲大同征虜有功尋轉員外郎進本部郎中奉 勅清理陝右邊儲景泰三年命將討播州寇復以敬總督軍餉兵不乏食戎寇悉平天順初擇廷臣分督邊儲而宣府則委之敬焉所至以廉幹公勤稱三載還擢福建布政司右叅政惠敷績著閩人德之以疾卒於官得年甫四十

有六中外嗟悼咸以爲未究厥施弟政舉天順三年鄉試任西安府知府時三年不雨民饑甚欲爲亂禁戢有方賑濟有法民得安妥陞河南布政司叅政其勲業與敬相伯仲焉孜亦中成化十年鄉舉卓有文譽子英登成化丙戌進士拜監察御史彈劾有聲陞四川按察司副使一門父子兄弟之盛爲廣平鉅族云

李果

李果成安人景泰庚午舉於鄉初授山西平陽府通判分理易州廠柴薪綜理周詳臨晉有刁民楊耀及

臨汾盜祝英等皆長惡不悛里閭畏之果申明憲典
諭以禍福皆改行從善焉及考績獲錫命擢杭州
府同知海岸舊有朱將軍廟者禱雨輒應歲久廟圯
值大旱新其宇而禱之甘澍霑足西湖水時溢爲民
患果築隄防之民賴其利謠曰開湖偉績千秋利捍
海高名萬古傳奏最加俸一級尋陞濟南府守惠澤
四達歸田卒入祀鄉賢所著有四書音考大學明解
小學摘義及校補衛生寶鑑諸書板行於世

劉誠

劉誠字敬之世家廣平之雞澤誠賦質明粹幼知向

學不煩督勸弱冠登天順丁丑進士擢翰林院檢討
輔導德王尋陞秀王府左長史從王之國賜四品章
服王薨改寧國府同知仍食正四品俸在郡有賢聲
遷湖廣布政司右叅議童時喪父悲哀毀瘠如成人
事母以孝聞家貧爲童子師資束修爲養旣仕凡俸
祿所入悉歸於母錙銖不入私室每有賓客讌會先
具甘旨進母然後出以待客終其身以爲常嘗以公
事蒞施州久不見母一日方治文書忽潛然不自勝
從吏請其故誠曰吾思吾母不得見耳兄早喪事寡
嫂敬而有禮其孝友蓋天性也少從國子丞閻子與

學易旣登第窮探力索務求四聖之旨嘗謂焦贛易
林專取納甲飛伏非聖法迺作周易衍辭其文與雅
深於易者躡之又取漢唐宋詔誥章表可爲訓者作
典謨遺旨楚漢以降詞人之作散見諸書採其得三
百之旨者作風雅遺音邵子皇極經世自鄱陽傅氏
後知之者鮮誠深究其理欲加之訓釋而未就也蔡
氏洪範皇極內篇揲法不傳精思潛玩遂得其法且
爲補其釋數之缺蓋其立志直欲與濂洛關閩諸儒
同歸不欲以文詞名也其爲長史以禮輔王多所啟
沃作千秋日鑒錄以獻王嘉納之及王就國汝寧在

途淹留上章懇諫王卽兼程以進旣抵國羣小欲毀孔子廟以廣王官力諫不可廟得不毀嘗講書西伯戡黎誠王吳氏說曰戡黎者武王也右長史趙銳主孔氏說曰戡黎者文王也誠曰紂都朝歌黎在畿內豈有人臣伐畿內之國尚能退就臣位乎此乃孟津之兵首事於黎耳相與辯於王前王解之曰二先王皆先皇所選以輔子經義未明不嫌往復何遽見於辭色其思寇賈交歡之義乎誠頓首謝其在寧國凡所設施務在安利其民不恃聲威以徼時譽上官或非之自若也及在湖南所至教民築陂塘以備旱

濂嚴保伍以防盜民其化民振俗嘗引古誼諭之不
加笞罰或譏其迂誠曰吾道如是也居官廉俸祿之
外毫不妄取成化十六年六月疽發於背慮遺母憂
有問者輒曰無傷也疾亟以手拊床曰我死不足惜
第念老母不獲終養耳遂卒享年四十有八卒之日
囊無寸帛幾不能斂賴僚屬相率致賻乃克歸其喪

鄭賢

鄭賢肥鄉人生而穎敏不凡少孤力學鄉里推重與
封史蔣鳳知州郭敏相友善時稱爲肥鄉三傑登
順庚辰進士授南內尹仁厚平恕居二年以母喪

去士民追思之不已服闋改知新鄭縣賢治之一如
河內未幾以疾解組歸田里築圃結廬明農課子爲
優游終老計鄭民德之列名宦祠祀焉賢退居凡二
十年足跡未嘗輕入城府人咸稱其恬靜儉飭有古
人之行云

鄭銘

鄭銘邯鄲人登天順甲申進士授監察御史成化二
年巡山海關繼巡陝西茶馬皆有靖邊足用之畧尋
按蘇州等處擊貪暴獎善良伸冤抑聲振南畿時有
嘉定賊越獄倡亂者銘率民兵勦平之陞山東按察

司副使然以性不阿比有闕宦譖之左遷山西叅議後得直累擢本省左布政使持憲兩藩多所樹立後乞歸老卒於家人咸稱其宦履鄉評兩無玷云今入祠

王濬

王濬威縣人幼負異質登成化丙戌進士任監察御史巡按陝西山東蘇松常鎮等處所至有激揚聲其按蘇松時隆冬有建議驅衆以濬運河者民不堪勞多凍死濬奏止之全活者無筭累官南京都察院右僉都御史風紀凜然巡撫甘涼重鎮及提督鄖陽荆

襄等處練兵儲糧民安盜息虜聞風遠遁時兵部尚書王越生平氣岸嶄然少許可嘗爲經綸治化卷以贈濟有詩曰中丞才與識兼全赫赫威聲滿路傳學海洗清三省地筆鋒撐任半邊天救荒曾爲民儲粟執法不容官要錢公論廟堂虛席久幾時歸侍 玉皇前後卒於官今入祠

郭忠

郭忠肥鄉人登成化己丑進士少有志操爲諸生時嘗旅宿比舍有女子夜奔拒之不去乃出避之筮仕戶部主事督收京儲尋督天津諸衛及汗石諸場芻

賦宿弊盡會計允當遷員外督儲臨清職務畢舉
進郎中有宗室訟民田久不決勅忠勘實歸奏
稱旨及擢守處州嚴關防判訟獄忠信明決人不
敢欺焉處有銀冶土人競利恒據險爲患忠痛懲其
不悛者復設法禁之其患始息至於感神夢以獲大
盜敷惠政以還逋民禱雨而雨輒應祝蝗而蝗盡死
瑞竹瑞蓮嘉禾異草疊見於郡衆咸歸頌於忠而忠
不自以爲德也是秋鄉試郡士無一中式者忠欲以
朴示教鄉大夫力爲先容庭見之際峻言勉諭之自
是以作興文教爲已任士類奮然來科遂中數人嗣

是蟬聯科第者比比也忠治處之政皆取諸所豫策者行之處人輯其條教曰爲政紀綱曰括蒼規約以傳爲建生祠祀之忠家教甚嚴弟恩舉鄉貢懋惠皆有文名子鄂猶子郊俱登進士第鄙亦鄉貢進士所著有詩文若干卷

賀思聰

賀思聰永年人性純篤警敏業儒有聲登成化乙未進士初授亳縣令吏良民懷會以憂去服除亳人詣闕保請復任得允終以惠政奏績擢光祿寺丞進御無侈靡上眷重之尋擢本寺少卿聰峭直不阿比

忤當道意出謫陝西運同廉白自持且多所建明以紓民困民德之爲立生祠未幾擢守丁州惠澤流行大得民心後以疾告歸晚節益勵非公事不至邑室郡守秦民悅嘗語人曰始終完節賀公可以爲人師矣衆以爲確論

連盛

連盛永年人成化戊戌進士弘治中拜監察御史性剛介方正彈劾有聲貴戚爲之斂手正德初擢山東運使時逆瑾擅權中外爭賂之盛獨抗直不附瑾怒尋以事中傷之竄海南盛携家屬毅然就道未幾瑾

誅 詔復舊爵而盛已逝矣及還葬 天子遣使御
祭焉

董 威

董威威縣人成化丁未進士任南京戶部主事轉郎
中清慎自持會計必當陞江西布政司叅議時逆瑾
播弄威福藩臬多納賂求媚不者必陰中傷之威曰
枉道徇人剥民取寵君子不爲也吾寧自守以獲罪
吾甘心焉瑾聞之果矯 詔遣輸粟於居庸關以贖
罪威傾囊輸之了無怨色尋轉叅政上章求去當時
稱爲急流勇退焉

馬子聰

馬子聰字舜達廣平人登成化丁未進士初授南京禮科給事中時孝宗御極之初都御史錢鉞本以庸瑣叨致高位守備太監蔣琮復克悖貪縱無所紀極子聰奮不顧身首劾錢鉞之倖進繼陳蔣琮之奸惡朝廷卒納其言於是罷錢鉞繫蔣琮於錦衣獄未幾丁外艱去服闋赴京復除北京禮科再轉戶科朝廷將於萬歲山建毓秀亭費用不貲中外洵洵子聰具疏以陳上命輟毀之前後數十疏大畧深切時政排斥奸貪皆衆人不敢言而獨言之者然終以

此忤巨璫欲中傷之因母老給假省親許之明年春
吏部兩推南藩大叅竟爲宦官所阻是年病卒於家
爲衆所惜云

蔣 勛

蔣勛肥鄉人幼孝友聰秀動止端嚴成化登辛丑進
士授河南濟源知縣時民俗獷復喜爭勛至勤慎寬
廉斥猾胥擊豪右以雋果集事衆駭愕而服甲辰歲
歉撫養瘡痍省減逋負民賴全活者甚衆丙午徵赴
銓曹尋授御史立 朝諤諤不少依阿弘治戊申奉
勅給賞紫荆等關軍士已酉奉 勅查盤遼東糧儲

庚戌奉 勅巡視居庸等關悉隨事清理茂振風裁
辛亥出按山西糾貞百度明年監鄉試爲秋闈十事
圖咏以勸士乙卯陞河南按察司僉事積歲訟牒填
委省閱俱完士類中貧不能舉婚喪者捐俸餘濟之
戊午分巡河南道往蒞洛西至陝州疾作歸汴臺卒
於官時悼惜之

孫修

孫修字用吉號廣原其先蜀之富順人父顯行貨燕
趙間時正統己巳所在盜起遂占籍邯鄲應募禦虜
積功至指揮使生脩十有二齡父歿母拊脩孀居脩

少卽勵志於學文譽焱起高出倫輩弘治辛酉舉順
天鄉試乙丑舉進士正德改元拜戶部浙江司主事
出視壩上諸廐中官素羣蠹其中逆瑾焰方熾衆皆
危之脩曰惟法是徇餘非吾憂也已而卒無他已已
命責逋賦於蘇常嘉湖諸郡脩召守若令以禍福諭
之未幾吏勤於督民樂於輸賦入大司徒錄其勞進
廣西司員外郎尋改山東道監察御史是時言官救
過不暇衆縮若革澤凍人脩獨侃侃自將咎譴亦弗
頃之瑾敗脩治其獄有能聲辛未擢陝西僉事治
延綏之東陞督察姦蠹峙糧訓卒虜偵知有備引去

總制張公泰輩薦於朝者凡六疏癸酉改理全陝屯
政邊民不忍其去攀號滿野甲戌巡撫金公獻民輩
復薦於朝凡四疏先是屯廢不治者已數年脩立法
簡而嚴歲入數倍於昔陝人神之乙亥虜犯秦隴別
部萬餘奄至平涼藩臬重臣有事於土者皆不至脩
偶以公事過其地關柝弛備宗室內震城且陷急令
塞諸門招胡騎哈指揮者率敢死士百人發勁矢射
之虜大驚乃環城數里而陣於是城守始嚴虜遽引
却當是時微脩則平涼皆虜魚肉矣總制馮公清輩
尤偉其績與部使者論薦六七疏丙子夏進陝西副

使秋監文試戊寅陝人御史宇文鍾主事田龍與給事中王元凱有隙王誣宇文以謀逆有狀鎮守中官劉寶惑於廖愷之說奏於行在所武宗命逮至軍門鞫之脩察其無左驗止錄尤重者數人械送南都劉怒曰謀逆大事也烏可止以鍾龍輩塞詔旨其家屬并諸證人宜悉在遣中何故釋之衆不敢應脩徐曰鍾龍雖曰謀逆而按驗無狀執二人以往足矣它日鞫而實彼家焉往如其誣也必獲伸雪又焉可累及無辜哉且誰無子弟公亦宜自念其家劉噤而止二人至南都雖瘦死獄中而其枉亦白罪竟坐元

凱而數十百家卒賴脩以免庚辰秋商有巨盜嚴天
柱獲礦利甚厚擁其徒三千人襲商州破之遂僭號
署官聲搖關洛巡撫鄭某陽托固原有警避去檄脩
禦寇脩率兵五千疾馳赴之甫一月雉獮無遺者既
立功當有異擢而本兵欲薄鄭避事之罰不復序列
僅被勅褒賞而已辛巳擢山西按察使公廉有威上
下憚之銓司擬以巡撫甘肅雖未得 旨而聲望益
重嘉靖癸未擢河南右布政使尋陞浙江左轄舟行
抵維揚母病去浙祗數驛或勸倍道赴之有不諱殮
費可責辦有司修泣曰此豈規利時哉留二旬而母

竟卒乙酉秋服且闋遂菴楊公在關中首疏薦之丙
戌補江西左轄脩念兵火之後公私空竭乃謹出納
杜請謁常賦賴以稍裕丁亥拜右副都御史巡撫湖
湘脩夙望素嚴賦吏初率棄印綬去時顯陵繕治與
有勞勩戊子改南京操江江洋巨盜陳表出沒剽江
上諸民居乃嚴立賞格躬率舟師蹙之三月就縛
上嘉勞有白金文綺之賜脩以北院改南其秩任如
故特以操江與在院者事權稍異院長張琮抑脩於
後來者之下脩不悅曰禮與法未之前聞也吾不能
辱官以媚僚友遂不復入院視事而引疾之志決矣

己丑春以災異自陳詞甚懇惻 上特聽之卽日北
歸杜門謝客數有薦者謂脩宜用不宜廢亦漠然若
不聞也居家數年病卒年五十有六

胡 瓚

胡瓚字伯珩號紫山永年縣人也瓚少警悟年十六
補邑學弟子員善爲經傳義督學御史陸公奇之登
弘治癸丑進士明年授官行人屢奉命湖廣河南山
西冊封諸王至皆以謹廉稱庚申擢監察御史乙丑
按關中尋丁外艱服闋復除監察御史再命按關中
故事御史按事例一年歸逆瑾專政累年符牒下諸

省事未竣者皆令瓚督上之遂留陝二年始得代瑾
誅陞南京大理寺丞尋陞大理寺右少卿轉左時

武宗皇帝命太監蕭敬錄囚大理寺瓚時握篆遇有
疑獄輒爲敬反覆辨之敬歸白 上謂瓚爲眞法司

遂有寶鏹內醞之賜大司馬胡公世寧初在江西疏
逆濠異志逮繫獄倖闖錢寧脅刑官必坐以誣告親
王罪至死瓚曰濠謀賴世寧以發而置之極刑何以
服天下遂與輕比議上留中衆謂不測瓚不爲動後
世寧竟得戍遼東瓚等但奪之俸丙子陞都察院左
僉都御史巡撫大同興利革弊剔蠹除奸宗室有遺

毒地方者瓚䟽其罪錮之高牆復上邊務六事原情罪以責戰守嚴事例以防推避體人情以省支費養間牒以資探報明賞格以激人心增兵備以專經畧上皆嘉納之庚辰武宗皇帝幸大同虜大舉入

寇瓚督官軍與戰大破之上賜璽書褒美及蟒衣

三襲復推恩任一子錦衣衛百戶瓚以沙漠之地

上不宜久留而扈從邊兵及諸從臣多怙寵大爲邊地害上䟽極論請回鑾至引漢袁盎諫文帝馳峻坂之論不報因乞休乃與告歸辛巳卽家起操江留都䟽陳江洋事宜大畧專委任明約束實軍伍示激賞

處戰艦時操練 上皆從之尋陞右副都御史癸未
陞南京刑部右侍郎尋轉北刑部甲申陞戶部左侍
郎乙酉大同卒亂戕害撫臣劫掠庫藏 朝廷命大
臣撫之益驕悖 天子乃赫然震怒勅瓚提督軍務
偕總兵都魯綱統兵往瓚曰此首惡數人耳豈濫及
無辜吾惟殲厥渠魁當自定耳未至大同四十里駐
兵授方略於羣將都督桂勇朱振由是首惡就誅地
方悉平還京 上嘉瓚功有白金綵幣羊酒之賜時
有短瓚於 上者瓚不與辯第屢疏乞休 溫詔勉
留之初魏國有賜田山海撫寧諸縣幾千頃業已給

民而其孫光祚復請之瓚謂撫寧逼近邊塞貧民世
守之業軀命所關奪之恐生意外變由是 上卒不
與戊子陞南京工部尚書奏裁內監局冗食工役之
半履任九閱月致政歸踰月以疾卒於正寢壽五十
有九瓚天性亮直事親孝處兄弟不私其俸入輒付
其兄令營生產二弟令進學京師累大官囊無厚積
好爲詩有唐人風致所著有柴山詩稿若干卷

王育英

王育英威縣人弘治己酉舉人任建平知縣以賢能
政績溪持身有法施政有序兩任清勤薦剡交上因

親老乞終養母清操愈厲非公事不見邑宰雖逆意不與人校鄉飲三十餘年享年九十有七鄉評謂其居官無玷汚居鄉無罅議有德獲福爲時重望云

申 綸

申綸永年人性忠亮有雅度弘治乙丑進士授知山西定襄縣續丁內外艱居喪盡禮歷永康平陸太原尹擢守潞州所至有惠政入爲兵部員外郎轉戶部郎中出納維允遷衛輝知府政和民安有蝗不入境禾生六穗之異士大夫詠其德政者有曰無冤清漢獄多稼頌周田中州論循良吏必以綸爲稱首乙酉

調常州明年述職以治行卓異首 賜宴賚焉不踰
年擢四川按察司副使尋改雲南風裁端嚴得憲臣
體尋告歸時年六十三矣築室淦水之側扁曰南濱
草堂日夕徜徉其間倡郡之耆宿效古人爲真率會
郡邑大夫每就其家咨訪治道均田賦開闢河多出
於其議焉

薛謙

薛謙邯鄲人弘治元年歲貢先知陝西蘭州金縣愛
民如子時民有疾疫爲醫藥以療之存活者衆有死
無所依者爲之置棺具以痊之九年將滿陞浙江金

華府通判催科不擾時大旱謙率衆徒步祈禱未幾大雨如注頌聲交作致政歸家利人濟物接士大夫以禮有勞謙君子之風壽九十一而終

杜 璋

杜璋鷄澤人弘治十四年舉鄉薦初授鄒縣尹時流賊剽掠城邑及於鄒平璋親率士衆拒敵四日兵力不支城遂陷于崇熙被害璋冠帶危坐辭色慷慨賊以兵逼之碎其襟袖卒不屈賊欲殺時縣丞某求以身代死賊義而兩釋之以去後改潞城射洪二縣令俱著美績以親老乞歸終養及親卒廬於墓側三年

鄉邦皆稱其爲孝子云

朱 雱

朱雱永年人性聰敏耿介少孤事兄以弟聞篤志好學鄉試屢次不偶弘治丙辰以歲薦卒業成均授陝州同知歷官十餘年清慎不渝後乞歸祇挽一車回田里足跡不入城府力田課子稍有餘卽出以賑鄉鄰之貧乏郡大夫屢延之鄉飲皆辭不就人人稱其有古君子之風云

趙 鹵

趙鹵雞澤人以歲貢生任戶部司務忠厚直慤遂於

理學居常以清介自守及陞南京刑部員外郎操履益堅有屬吏杜姓者以金三百兩來餽奪却之不受時人咸以關西楊震稱之歸政之日行李蕭然居家事親之外惟杜門修輯有詩經會意等編行於世

張潤身

張潤身成安人登正德甲戌進士第初知西安縣事以賢能著聞選授戶科給事中歷轉工吏二科有謇諤聲親老乞終養釋服後轉兵科都給事中居諫垣前後十三年彈劾不避論巨璫之席勢貪將之債兵與夫指斥侍近之汙穢停寢武弁之奏帶諫疏數百

篇皆切中時弊被劾者陰相排擠遂出守平陽比至郡問民疾苦狀凡利所當興弊所當革者卽次第行之百度蘄蘄居二載浩然有歸志卽抵家日唯以耕讀課子睦族人敦鄉約爲事後以疾卒鄉士大夫咸稱其文章政事多可紀述所著有四科奏議傳焉

連鑛

連鑛字伯金初號白石繼號明山其先從上黨襄垣徙家永年縣鑛天性豪邁神清氣爽與人不苟合事父母孝敬處兄弟友義讀書求諸心得文追先秦詩步盛唐字法端勁如其爲人所著有明山疏略燕山

漫稿人以私事言者仰面不應立朝以忠貞自矢惟
利於國不卹其身語及賊吏姦黨則怒髮上指若不
與之並立者居官二十八載而囊無厚貲鑛以嘉靖
壬午舉鄉薦丙戌成進士選翰林庶吉士以時例出
補日照日照地鹵民瘠逋賦爲常招來撫字租稅不
乏改令建平豪健難治潘姓者怙勢強娶婺婦鑛治
之以法境內肅然有虞順者挾妖術據五牙山爲亂
設計擒之有紵絲白金之賜甲午陞戶部主事督理
易州倉廠豪猾皆望風遁去掌崇文門稅大司徒梁
公姻屬有匿稅者論如律梁公歎服謂其相信之深

也十四年詔改風力部屬爲臺諫遂授山西道監察御史巡陝西茶馬條陳種馬牧地事宜皆見實用後改浙江道恭送 章聖梓宮葬承天復蒙紵絲白金之賜庚子按山西議類解額辦錢糧而三晉民力少蘇時秋警方毅兼鄉試重務鑛晝夜勤理疏五上皆切中機宜科目亦稱得人議寢馬地餘銀廣平八郡陰受其惠條陳防虜八事語過切直罰俸三月 上由此益知其名癸卯陞浙江副使丁卯陞河南左叅政巳酉陞廣東按察使真戌陞右布政尋陞浙江左布政辛亥陞都察院右副都御史奉勅總理河道是

歲澍雨運堤衝潰阻後幫四千七百餘艘鑛自濟趨
邳極力疏通至十一月而工竣上䟽曰北河張秋濟
寧地高而水易涸患在春月故啟泉門以濟之南河
自徐州小浮橋引莆河以濟運而清淮一帶橫流浩
蕩犯之尤難必春夏未盛之前可循也運早過淮則
南河免汜濫之憂北河當順利之勢識者皆以爲確
論因請造運船補軍夫先時徵兌早督過淮堤濬新
莊等閘以爲來春運地壬子 上命以原職總督漕
運兼撫治鳳陽等處因請䟽治房村汙塞及濬黃河
下流使循故道始至淮值漲水殘傷之後蕭徐邳宿

滙爲巨川百姓轉死劫掠者不可勝數鑷奏蠲夏稅
秋糧發粟賑饑使民應募河工水落田出則示所司
給牛種勸樹畜而淮徐之間稍休息焉去之日疾作
於途抵家卒享年五十有九

李仁

李仁字士元曲周人少強學工文辭登嘉靖癸未科
進士授戶部主事出守許墅關自勵清苦及去撫按
爲之立水鑑碑轉本部員外郎未幾卒於官

王允武

王允武字殿邦別號棘亭其先自山右徙居廣平允

武生而敏慧才質過人長厲志讀其父書爲文雋朗
多奇氣旣隸學官每試輒冠其曹性嚴重不與曹伍
卽其曹亦帖然服之顧數試數不售晚乃以明經入
太學嘉靖庚戌謁選銓曹除江西南康府通判南康
地故瘠薄而俗善逋賦每郡吏督賦者至黠者輒醵
金錢前爲壽一入其賄卽噤不敢問以故賦恒逋允
武廉直不私受謁旣視事前行金者徘徊門下不敢
入乃召諸逋者按緩急爲期而遣之諸黠凜凜以次
輸無敢後期者部使者奇其能疏聞於朝爲下璽書
褒予之會守缺卽以武攝守事時粵西狼兵調入剿

倭者所過橫甚百姓患苦之以次至南康郡人甚恐乃預爲檄檄其渠率曰以爾勦倭柰何乃自爲倭今與爾約餽餉不時罪在所司餽餉時而爾橫如故三尺法具在吾知用吾法耳率得檄懼而戢其下允武亦勅屬邑爲具以待竟過南康無敢縱者郡瀕湖盜賊之所出沒舊有游徼船若干艘歲時繕治郡任其費而王者任其勞守備其匿其費而責繕治於郡力持不可其恚甚譖於巡撫都御史都御史怒爲停其月俸乃徐條故事暨所爲侵匿狀上之都御史內媿卒褒其治行爲江右第一饒萬年令其以腹削機兵

月糧爲所訟讞者受賂右令而重繩諸訟者衆兵怒
遂歃血以叛饒郡戒嚴時直指徐公方行部至饒倉
卒無以計適允武以它務至徐公喜曰王別駕來事
其濟乎卽令之停他務而撫亂兵諸亂兵聞允武來
亦相戒無動王公治我吾屬當無患矣前讞者私謁
冀爲之地不應旣繩諸亂首而令亦論如法衆心始
安直指益奇之卽以署萬年事乃更約束嚴稽覈省
一切煩費鹽米瑣屑一取給于南康壯兵某訟其隊
之長而所株連甚衆心察其寃爲爭之御史竟反其
獄萬年民頌之治萬年凡六月以考績赴闕下民攀

留不可得則相與圖像尸祝之既以最聞名益起復移景德鎮董陶事愈孤立行一意自責額外諸造爲淫巧以賂遺權貴人者槩從禁絕歲省工費數千百緡景德人德之如德父母浮梁尉某以巡徼至鎮而縱其徼卒有所剽取民不勝忿鼓譟圍尉將甘心焉尉恐避匿允武署中允武爲尉慰民民乃解散去庚申陞兩淮鹽運司副使日講求利弊擇所爲通商惠民者佐其長次第舉行之或有諷之爲囊橐計者峻詞以謝其人慙而退都御史鄢以嚴相私人得總海內鹽政大以賂聞鹽政壞亂淮商黃某鳩金數萬將

逆諸境上廉得其實亟置諸法淮陽鹽賦甲天下都御史視爲外府比至無所得大恨之會遷慶府右長史猶未釋恨嗾所厚善御史伺其隙無所得竟以老落職致仕時年五十七耳旣歸杜門謝客布袍蔬食無異寒士又數年壬戌秋以疾卒得年五十有九

張 棐

張棐邯鄲人登嘉靖壬辰進士授金壇令金壇爲江南劇邑素稱難治棐至祛宿弊布新政立劉漫漶之廟表張節婦之貞凡所以正人心勵風俗者務以禮義激發之尋遭內艱去服除補河南之延津時值歲

歡民窮盜起棐賑救招來賴以全活者甚衆鄰邑之盜相戒不入境巳亥 大狩南巡所過郡邑俱費不貲而延津得免於困者皆棐經畫之力也民爲之謠曰前有張清張父后有邯鄲張母云三載奏績最擢南京河南道御史清忠亮直凡臺中所上封事多棐具草辛丑奉 勅按下江慨然有攬轡澄清之志激揚得風憲體壬寅夏歷潤州感疾還京復 命事竣便道抵家卒於正寢鄉人咸嗟嘆之謂其充積極盛而厥施未普云

石 永

石永字壽卿威縣人嘉靖壬辰進士授中書舍人乙未擢雲南道御史丙申巡山海關覈部伍校技藝焯著風采尋丁內艱服闋補河南道庚子按淮楊熒廉斥墨不少假貸法豪強爲民患者未幾疏乞養病歸壬寅起補山西道巡按四川所至訪吏治得失示勸懲有豪強按罪當流候永出伏刺客於橋下至則其人忽心寒作聲執之輸情請罪蓋鬼神默佑之也監癸卯鄉試綜理周密號稱得人乙巳掌河南道大計京朝官持公秉正謝絕私交於小過不事苛索備訪當權怙勢潛通關節及中傷善

密呈臺長曰必

去此爲公不則縱吏部與臺長去留一無異議後有
忌之者陞知南陽府尋以事註誤降判濱州怡然就
任丙午陞南京太僕寺丞丁未陞平陽知府芟煩祛
靡與民休息藩府競訟累年不決委曲開導訟乃息
太宰張潤稱其風寒貴戚威寢奸豪戍申陞陝西副
使駐甘州竭力經營郊行見原隰草木蕃盛詢知舊
爲水田以地震泉湮遂求濬其泉五十餘處灌田八
百餘頃居民爭復業庚戌陞陝西右叅政視涼州地
宜耕募民墾闢導泉以資灌溉後皆爲沃壤甲寅陞
陝西按察使持憲明慎民以乂安乙卯陞江西右布

政丙辰轉山西左布政使未抵任陞都察院右僉都御史巡撫延綏至則飭將練兵革冗役禁包占懲負販養勇敢謹問謀有點虜犯仄條溝前後斬首級獲駝馬器械甚衆節蒙金幣之賚凡三任朔方歷九年民戴之尤深丁巳陞南京大理寺卿戊午改南京兵部右侍郎己未陞兵部左侍郎兼右僉都御史總督湖廣川貴等處軍務一崇寬大率屬以廉凡事務責實效不爲文具徭賊沈雅等勢猖獗督率將士直擣其巢於淑浦縣龍潭等諸洞捷聞 賜白金彩幣方隅晏然時督撫請調葉麻等司兵禦倭永上疏極論

不便乞免調以安地方省糧餉蒙 俞旨著爲令三十九年召爲戶部左侍郎瀕行疾作三省以藥費贐禮致餽正言却之疾篤總兵石邦憲副使李心學問所欲言自軍國外無一語尋終二君爲歛視其橐中無一物胥嘆以爲不可及云

賈待問

賈待問字學叔別號春容其先東萊人國初徙籍威之新臺里母娠夢神白衣執幢導一童子入門寤而降生嘉靖戊午舉京兆高第隆慶戊辰成進士令陝之咸寧咸寧當省會煩劇待問才敏器博推以至誠

案牘如積迎刃而解嘗清兼并之稅五千餘頃治聲
流聞壬申召爲禮科給事中稍遷吏工左右其居瑣
垣也風儀詳整進退雍容而擊斷糾虔不諱彊禦再
疏論劾馮璫聲震中外 上固不之罪也而當塗嗾
之出爲懷慶知府懷慶古之河內沁水出城西北秋
雨汎溢民居漂流乃疏而濬之築長隄其上水不爲
災察能調煩改守松江松江中倭日深困於兵食爲
節縮裁省除冗役冗食若干請發帑金五萬代墾境
內閒田下其直而售之得金三千以佐都水戊寅陞
山西叅政駐節汾州汾城殷殫民居東南二郭狹而

憂虜乃增西北二郭爲之子城恣民徙占辛巳轉本省按察使甫三月陞湖廣右布政使無何轉左居楚三年出納平允賦吏無所低昂潦旱薦災請免秋稅七千餘石絜以爲額楚民德之甲申轉南京光祿寺卿旋拜都察院右僉都御史巡撫南贛鎮遏有方盜不入境䟽通鹽法使吉人受竿於廣公私交便丙戌召入協理院事道中進右副都御史巡撫福建條上清查寺田兼省客兵禁勾引簡練水陸諸事精意行之皆有成效旋以內艱去庚寅火真與套虜合入寇莽捏二川河湟大震詔遣經略制府會兵出討適值

服除起撫甘肅至則日夜籌畫設伏制虜斬甲首及
鹵馬牛羊無筭招其旁番族八萬有奇虜斷右臂不
敢飲馬於河明年改撫陝西會有他 詔需後命家
居三年薦者日衆乃以操江起家陞兵部侍郎兼右
僉都御史巡撫陝西時當寧夏兵變歲復不稔民多
饑莩多方拊噢稍得蘇息秋月防虜移駐河湟適中
調度再出遮擊斬首積二百三十餘級所俘鹵降服
可六千餘虜創而逸西塞以寧詔晉右都御史仍兼
侍郎巡撫如故已而關中又饑下在所長吏煮粥施
賑全活可數萬人松山在河西塞外羗虜之要地小

酋賓兇竊據三十餘年莫能驅逐乃會制府甘肅大
集七路之師分道出擊遂復疆土所部將吏收番族
千七百有奇馬駝牛羊萬四千有奇羗虜道絕詔晉
兵部尚書兼右副都御史巡撫如故久之火酋復入
寇邊遣將逐之戰於節子岡斬首虜二百有奇詔進
勲階壬寅九月二品滿考會樞府以積功併聞詔進
太子少保賜之策書時以防秋出次十月事竣還省
行至臨洮以寒疾卒享年七十待問撫陝八年德教
浹洽元元樂業稅使梁永恣其儻從剝民財物多殺
無辜上疏劾狀逮其人付之重典梁請於四鎮稅馬

及得鎮守三邊如正德故事曰此亂萌也亟會制府
上疏力陳不可其謀遂寢陝人歡若更生及其沒也
軍民悲惋如失所天云

王世揚

王世揚字孝甫先世家山右後徙居爲廣平人世揚
淮運使允武之孫也母方娠夢宰官擁童子從天門
下曰以錫汝寤生世揚能言已英英露頭角旣授讀
輒了了大義垂髫補博士弟子員學使阮公鸚奇其
才時從大父官於淮慨然民叱吏弊與伉直之不得
伸也廉吏之不見察也庶幾當吾身一振之年十九

喪父益哀苦厲志一燈熒熒伊吾寸管間往往分夜
三十三領鄉書明年成進士官行人司行人三銜命
名藩所至謝却餽遺詢謠俗識者知其有遠志壬午
選湖廣監察御史尋奉命按視潼關茶馬值歲稔
疏留賑又蠲贖鍰共二千金復疏請茶課二千金賑
之七監置種馬闢荒地易餘茶是歲秦饑而不害甘
肅故以番爲蔽也番與虜鬪世揚曰番入茶供馬我
卵翼之久矣俾折而入於虜何以示武且恐西陲多
事傳檄切責虜母剝我籓籬不者且犁爾庭亦約束
部番勿輕挑釁是歲河西烽燧頓消寫爾等八族者

生番也任牧莊浪西北林莽間頗媚虜世揚曰河西
要害無踰莊浪而馬政獨闕可乎計收部如熟番歲
增馱醜四百七十騎歲省椿朋金五千有奇且斷匈
奴右臂自餘察吏安民肅然持大體當機畧多如此
類已奉 命按浙先是漕艘踐更不如期窘費且猝
不得辦曰是不足十五爾而太倉陳陳議改折十之
三國不費而民蘇賦集已䟽織造得減已䟽杭嘉四
郡災得蠲得賑間彈治其不恤民瘼者一二人浙吏
士亦復肅然而民安已奉命按中州中州歲歲患河
河蝕者無時而人蝕於河者恒竇竇汎瀾不可問猥

當其猝一切問諸水濱乃行視堤縷間俾積埽厚餼
旦旦若傲於蝕者且豁其虛賦使緣河流民占田自
種而河亦安其故道得不蝕或言道沁入衛可殺河
勢曰是虞溢也而不虞梗耶吾聞沁善淤衛獨當沁
則衛病而漕且梗潞居衛下獨得不念乎仍道晉入
河便會梁州連兩歲檄泗亳餘粟移賑之又議留兩
歲秭粟若干其所以饘粥兩河起溝中瘠而生全之
者又不啻浙東西四郡已比還刷卷京畿道尋遷大
理寺右寺丞歷左轉少卿 特遣仍兼御史銜閱視
延綏世揚故諳九塞詭調狀乘障士內壘市馬躋非

一歲所一切奉 璽書閱實按營壘下軍司馬上尺
籍新故儲糈幾何次第及屯政齟法堅甲利兵赫焉
一振馬如初市否者閉關其大賞轉賞勒如初額無
侵士儲糈夫儲糈以餉壯士寧餉虜壯士令乘障寧
令芟夷灌莽也具勒如制他所簡練部伍移壁斥野
謹烽燧布渠荅種種數千百年桑土計最後條十事
天子嘉之下所司覆著爲令尋晉左少卿遂擢右
僉都御史撫上谷初廷議撫史車二酋作塞外偵而
大酋黃台吉等闌與媾也計且縻彼以甘心我而撫
處者沮其款漫不厝意西庭酋安兔因是得誘史酋

依帳下與爲豕突三歲邊患苦無誰何世揚首下令
諸將亟招撫而西單于因是縛獻史酋 廷議欲俘
之 廟而覺諸世揚矍然曰是故吾屬也果爾則我
更爲鷓安兔爲叢塞下諸屬夷且股栗脇息急移書
大司馬復上疏 廷列狀竟得 俞旨還史酋所部
而諸屬夷謹焉嚙指稽角王公真卵翼我委心受戎
索而安兔懣然失算時闌入盜塞檄東陞將吏斬首
四十餘級酋憬然罷兵請媾故持之而左谷蠡王朝
兔輒與輔而抗我潛令降虜斬級獲馬朝兔輒掠我
乘障士易馬譯令謹視吾士委一士漠外者必擒爾

一當戶朝兔乃遁癸巳虜大饑關市馬不如額乃以額馬十折皮張馬一虜懼如更生而省歲市二萬有奇於是撫三年矣東西陲晏然亭障無聳縮省金繒無慮鉅萬萬考功上績加右副都御史尋內召協理院事錄蔭一子太學錫白金文綺尋又彙所縮省金繒功錫白金五十兩居無何晉兵部右侍郎兼都察院右僉都御史總督宣大山西諸邊旣稔藉其威名虜部諸酋皆嚙指稽角奉約束望其旌旂靡不凜凜也而獨安兔宿昔故怏怏復壁白馬關大營諸虜頗稍稍屬之世揚曰會須一大創此而後安寢檄各路

出塞前後擒斬五百餘級奪獲馬牛羊無筭安兔懼
叩關悔罪順義王青白滿諸酋頓顙爲乞款勒令還
我屬夷若而人故所登叛卒若而人往反支吾頗欲
得我所收部夷回易世揚曰部夷吾已署爲百夫長
不可得會須更一戰耳安兔遁歸諸屬夷出塞者不
復敢言回易他諸酋愈凜凜而白登甌脫鋒銷燧息
蓋先後部治虜諸方畧至是始完而三晉屹如長城
矣尋以正三品滿錄蔭一子太學戊戌召入爲少司
馬賜白金文綺次年晉都察院右都御史仍兼少司
馬協理京營戎政部署肅然歲終小閤分爲三等

同論官官同論薦薦同論資畫爲一切而簡汰諸老
羸竄尺藉者收召部伍以時訓練貴豪無得占一役
而名射者畢出更條十事以上 上嘉納之下所司
復列著爲令會甘肅捷奏復賜白金文綺晉兵部尚
書頃之自念太夫人春秋高乞省覲至四 上方倚
重勿允 詔中使勞問羊酒又三歲竟奉太夫人諱
以歸歸當甲辰歲晏時蓋六十餘矣泫然如孺慕免
喪廷推者二疏薦者屢俄而閱視者上宣大功特晉
太子少保錫白金文綺蔭一子世世執金吾蓋宇內
駸駸望復起而竟不可作矣

姚三讓

姚三讓字崇謙益軒其別號也先世由太原奉詔北徙占永年籍家焉生時父夢關壯繆與戰北而痕頷已生墮地痕頷宛然也稍長從學穎悟絕倫十歲嫻爲制舉文駸駸道上吳興潘公以督學試拔置文學弟子第一屢試輒冠聲振膠庠間萬曆癸酉舉於鄉連第進士授祁門令而披誠盡下不爲鈎棘祁人亦安其坦易獷悍化之若苾芻之翹陽光也歛民怙勢將嫁絲絹稅於同郡四邑民操挺起矣祁觀釁而動亟諭之謂有令在必不忍而曹代歛民且諫能已稅

乎祁以令故靡所譁卒之四邑扞文罔而祁獨安堵稅竟以不坐一時上下服其恬鎮足屬大事三載上績值母孺人棄養倉皇扶柩歸邑民攀號如喪厥妣枳其車三日不得行已相與醵金建祠勒石紀事他以常位祠者千家矣癸未服闋拜山東道監察御史乙酉出按三河醴周視醴池劑量池勢高下別爲塍畦翻車以時轉運不令亢乾潦淖猶夫土炭低昂屬諸造化而以吾陰陽反移之醴乃大有秋於是三河不至割裂方幅爲長蘆倍丁亥出按陝值歲大稔發賑勸貸迄無餘術忽有老父教以石爲糗糧石爛可

噉也奏石於朝舉朝咤異咸謂其精誠感格神明云按部務持大體不爲毛屑然所至不寒而栗卽諸王國人屏氣相下事竣用劇移疾歸歸數載未嘗以片牘抵郡邑門郡邑閭管不識驄馬姚公何狀諸守相令長無不凜凜於姚公甚者辛卯起補浙江道出按應天諸郡一切虧除興建風裁之外佐以陽和然至郡大吏有所憑依軌法則又露章糾舉畧不假毫釐人相指目謂曰此真御史也及報命肺疾忽作又驟聞父疾踉蹌以歸罹於大故哀毀踰恒丙申服闋猶委頓不能北上會臺檄屢至不得已趣駕入臺補

河南道掌道事清理軍政拾遺疏中多冒時所諱遂不能一日安於其位矣於時直言見訕南北省臺幾空無人先是權璫煽焰立貴顯人有諷以往詣者曰七尺之軀與三尺之輿孰重遂投綬以歸歸則杜門謝客密戚執友無故不一面遇婚喪可哀憐事則不恠傾橐以助之擇地營兩塾羣諸子弟延師督誨不倦奏疏剴切及他文皆沉渾爾雅然稿多逸去亦以見其生平任質不銜云

本朝分省人物考卷之九